

PERUTUSAN

YAB Perdana Menteri

Kerajaan terus komited terhadap pembangunan perusahaan kecil dan sederhana (PKS) yang berdaya saing dan berdaya tahan sebagai strategi ekonomi utama negara. Berdasarkan Banci Ekonomi 2016, PKS kini membentuk 98.5% atau 907,065 pertubuhan perniagaan di Malaysia. Pada tahun 2016, PKS menyumbang sebanyak 36.6% kepada Keluaran Dalam Negeri Kasar (KDNK) dan 18.6% kepada eksport negara, sementara menyediakan 65.3% jumlah guna tenaga. Menjelang tahun 2020, Malaysia menyasar untuk meningkatkan sumbangan PKS terhadap KDNK kepada 41% dan sumbangan terhadap eksport negara kepada 23%. Oleh itu, amat penting bagi PKS untuk meningkatkan usaha mereka supaya kekal menjadi pemacu utama pertumbuhan ekonomi Malaysia.



Berlatarkan cabaran dari luar dan dalam negeri, PKS terus mengatasi ekonomi keseluruhan, dengan pertumbuhan KDNK PKS sebanyak 5.2% pada tahun 2016 yang disokong oleh permintaan dalam negeri yang kukuh, dipacu oleh penggunaan dan pelaburan serta aktiviti pelancongan. Pada tahun 2017, PKS dijangka mencatat pertumbuhan yang lebih tinggi daripada unjuran pertumbuhan sebelum ini iaitu antara 5.5% - 6.0%, berikutan prestasi pertumbuhan ekonomi Malaysia yang kukuh iaitu 5.7% pada separuh pertama tahun 2017, manakala KDNK keseluruhan dijangka berkembang melebihi 4.8% pada tahun 2017. Jangkaan pertumbuhan yang lebih tinggi akan didorong oleh permintaan dalam negeri dan peningkatan pertumbuhan global yang lebih kukuh daripada jangkaan. Meskipun terdapat perkembangan positif, PKS akan terus dibantu oleh Kerajaan dalam menghadapi cabaran, terutamanya dalam mengakses pembiayaan, meningkatkan produktiviti dan meningkatkan pemacuan ke arah ekonomi digital.

Landskap ekonomi global berubah pada kadar yang tidak pernah berlaku sebelum ini. Kita berada di tengah-tengah revolusi teknologi yang akan membentuk ekonomi, model perniagaan dan proses masa hadapan yang akan memberi impak kepada cara bekerja dan gaya hidup. Revolusi Perindustrian Ke-4 atau IR 4.0 akan membawa teknologi yang akan mengubah dunia perniagaan masa kini. IR 4.0 merupakan konsep revolusioner yang memfokuskan kepada automasi dan digitalisasi untuk beralih kepada pembuatan pintar menerusi penerapan teknologi bersepadu yang berkomunikasi dan berinteraksi antara satu sama lain. PKS berada di tengah-tengah revolusi teknologi ini dan oleh itu, adalah penting untuk mereka bersedia menghadapi perniagaan masa hadapan jika ingin terus kekal relevan.

Peluang yang dibawa oleh digitalisasi dan teknologi baharu tidak seharusnya dipandang remeh. PKS perlu sejajar dengan Megatrend dan IR 4.0 sekiranya mereka ingin membentuk masa hadapan yang berjaya, sesuai dengan tema Laporan Tahunan PKS tahun ini. Walaupun pelbagai cabaran baharu menyelubungi lingkungan perniagaan, ia juga boleh membuka sempadan dan peluang baharu kepada PKS sekiranya mereka ingin mengubah model perniagaan mereka kepada trend global. Peningkatan besar yang dicapai dalam pelbagai bidang teknologi dan inovasi adalah pengubah signifikan *game changer* untuk perniagaan dan negara secara keseluruhannya.



Menyedari akan kompetensi teknologi sebagai langkah ke hadapan, Kerajaan semakin memberikan penekanan terhadap penerapan inovasi dan teknologi oleh PKS. Sebagai contoh, pada tahun 2016, Kerajaan terus memberi tumpuan terhadap Program Berimpak Tinggi (HIP) di bawah Pelan Induk PKS (2012 - 2020), seperti HIP 2: Platform Pengkomersialan Teknologi iaitu sejumlah 125 projek telah diluluskan untuk bantuan bersepadu dan 22 inovasi dikomersialkan. Di bawah HIP 6: Inovasi Inklusif, 15 inovasi sedia untuk penyerapan dan akan memberi manfaat kepada 620 orang dalam 12 komuniti.

Selama ini, Kerajaan tetap teguh dalam memberikan komitmen untuk membangunkan PKS. Pada tahun 2016, dana berjumlah RM5.77 bilion telah disediakan bagi melaksanakan 133 program untuk membantu 515,429 penerima manfaat PKS. Bagi tahun 2017, sejumlah 148 program bagi membantu 66,410 penerima manfaat PKS telah dilaksanakan menerusi peruntukan bernilai RM2.50 bilion. Memandangkan akses kepada pembiayaan merupakan cabaran kepada PKS, langkah radikal telah diambil oleh Bursa Malaysia untuk melancarkan Pasaran *Leading Entrepreneur Accelerator Platform* (LEAP) pada Julai 2017, iaitu sebuah pasaran persendirian yang ditadbir oleh peraturan yang lebih ringkas untuk PKS. Menerusi Pasaran LEAP, PKS dengan potensi pertumbuhan yang besar kini mempunyai wadah lain untuk mendapatkan modal.

Satu lagi pembaharuan utama yang bertujuan menjadikan Malaysia sebagai sebuah negara yang mesra perniagaan adalah penggubalan Akta Syarikat 2016 kerana Kerajaan menyasarkan untuk mengurangkan beban kawal selia ke tahap minimum. Akta ini menggunakan pakai prinsip peringkasan, komprehensif dan fleksibiliti bagi mewujudkan rangka kerja perundangan korporat yang bersepadu yang menjadikannya lebih mudah untuk menubuhkan dan mengendalikan perniagaan di negara ini dan pada masa yang sama meletakkan Malaysia sejajar dengan standard antarabangsa dalam menjalankan perniagaan. Sebagai tambahan, seperti yang kita sedia maklum, Kerajaan telah melancarkan Blueprint Produktiviti Malaysia pada Mei tahun ini yang menumpukan kepada peningkatan produktiviti pada peringkat nasional, sektor dan perusahaan, termasuk PKS.

Sekali lagi, PKS Malaysia telah menunjukkan daya tahan mereka dalam menghadapi ketidakpastian ekonomi. Melangkah ke hadapan, Kerajaan komited sepenuhnya untuk meningkatkan produktiviti negara dan melengkapkan PKS supaya sejajar dengan Megatrend dan IR 4.0. Pengenalan Blueprint Produktiviti Malaysia, bersama-sama dengan pengenalan Zon Perdagangan Bebas Digital (DFTZ) serta inisiatif baharu oleh Kementerian dan agensi yang dipelopori dan diselaraskan oleh SME Corp. Malaysia akan memastikan transisi yang lancar bagi PKS ke arah produktiviti yang lebih tinggi serta peningkatan sumbangan dalam ekonomi digital.

Memandangkan para peneraju perniagaan perlu mengemudi persekitaran global dan saling berhubung yang semakin kompleks dan sukar diramalkan, adalah penting untuk PKS sebagai tulang belakang ekonomi untuk menjadi tangkas secara strategik bagi disesuaikan dan mencari jalan baharu untuk berkembang. IR 4.0 harus berada dalam agenda PKS sekiranya mereka ingin merebut peluang besar yang dibawa bersamanya. Saya yakin PKS mempunyai keupayaan untuk mengharungi gelombang baharu perubahan teknologi yang melanda seluruh dunia, dan bersedia untuk menghadapi peluang, ancaman, risiko serta halangan dan akhirnya muncul lebih kukuh daripada sebelumnya.



DATO' SRI MOHD NAJIB
Pengerusi Majlis Pembangunan PKS Kebangsaan
September 2017

